



## ՏԵՍԻԼՔ ՀԱՎԵՐԺԱԿԱՆ\*

Ամեն գիշեր, ուշ ժամերին, երբ ննջում էր աշխարհն համայն,  
Նա ծնրադիր ու մտածկոտ Վաղարշապատ քաղաքից դուրս,  
Հնձանի մոտ կամ ջրհորի, աղոթում էր պաղատագին,  
Հիշում կույսերն անմեղ, անբիծ, հավատի Կոհ սուրբ Հոփսիսյանք:  
Ամահ Բանին մատակարար լուսավորիչ Կույզ Առաքյալք:  
Լոկ աղոթք չէր և կամ խնդրանք նրա խոսքը հոգուց բխած,  
Չէր երախտիք նրա համար, որ ինք փրկվեց Նոր Վիրապից,  
Դա ծարավն էր, տոչորումը իր Տիրոջ հետ հաղորդության,  
Որ բերում էր նրան այդտեղ ամեն գիշեր այդ ուշ ժամին:

Եվ մի գիշեր, երբ խավարն էր պատել չորսդին, աստղերն երկնի  
Տարօրինակ մի ճաճանչով փայլում էին պապղագին,  
Երբ ամեն կապ հաղորդության կտրվել էր երկրի վրա  
Եվ աղոթքով երանական նա տարվել էր ու վերացել,  
Հանկարծ զգաց, որ ինք մասն է վարթնոց դասին և ոչ մարդկանց:

\* «Էջմիածին» ամսագրի խմբագրությունը հրատարակելով «Տեսիլք Հավերժական» քանա-  
տեղծությունը՝ ջնորհավորում է հեղինակին՝ Ներսես եպիսկոպոս Պոպապայանին, իր քահա-  
նայական ձեռնադրության 25-ամյակի առթիվ: Մաղթում ենք, որ սրբազան հայրը հավերժա-  
կանի տեսիլով շարունակի իր ծառայությունը ի սպաս Հայաստանյայց Առաքելական Եկե-  
կեղեցու և հայ ժողովրդի:

Ճիշտ այդ պահին, բաց երկնքում աստղերն ամեն խմբովեցին,  
 Լուսն հավաքվեց և դարձավ ծով լուսաճաճանչ մի լուսարձակ  
 Երկնից երկիր դեպ արձակված, նույն այդ պահին երկնի հրեշտակք  
 Համանվագ ու քաղցրալուր երգն երգեցին, բլուր օրհնություն  
 Բերին աշխարհ, նիրհող մարդկանց՝ մեծին, փոքրին ու բոլորին:  
 Լուսն առավել պայծառացավ, կարծես բացվեց մի պատուհան  
 Երկնի վրա լուսապայծառ, և այդ լույսի հեղեղի հետ  
 Իջավ աշխարհն Այրարատյան Աստվածորդին ոսկեպսակ,  
 Աստվածորդին այն փառահեղ, պերճ զգեստով՝ ոսկի, արծաթ,  
 Բեռեկներով ազնվական, հազար ակամբ՝ զմրուխտ, հակինթ:  
 Իջավ աշխարհն Այրարատյան ու իր ձեռքի ոսկի ուռամբ  
 Բախեց գլխին ժանտ վիշապի, Սանդարամետը դղրդաց  
 Եվ աստվածներն հին կրոնի ու մապոթեպի վառ ատրուշանք  
 Դարձան մոխիր ու ավերակ, դարձան անցյալ ու հիշատակ:

Խոսեց Արքան տիեզերքի՝ Լուսավորչին Հայաստանի,  
 «Վայրն այս սուրբ է իմ իսկ իջմամբ և հաճությամբ, կառուցիր տուն  
 Դու պաշտաման՝ վերածնված փոքու հոտին քո Հայկապան»:   
 Նույն այդ պահին, բաց երկնքում ուրվագծվեց լույս շողերով  
 Նախատիպը՝ Մայր տաճարի, աչքին առջև Տեսանողի:  
 Հավատի հայր Լուսավորիչն զգլխանքից երանական  
 Երբ սթափվեց, երեք անգամ խաչակնքեց ու ծնրադրեց,  
 Որ Տերն իրեն արժանացրեց կենդանության հաղորդվել  
 Աստվածային սուրբ խորհրդին, հավերժական այս տեսիլքին:

Պալատն ամբողջ քնել էր խոր, մեծ տեսիլքին նա անհաղորդ,  
 Ննջել էին սյահակները տոթ գիշերվա մեղկ թմբիրով:  
 Ոչ ոք եղավ ականատես, ոչ ոք եղավ ունկամբ վկա  
 Մեծ տեսիլքին այս աննման, բացի մեկից՝ Լուսավորչից:  
 Պալատ մտավ Լուսավորիչն առավոտյան վաղ քան արփին,  
 Փոխվել էր նա, պայծառացել, նոր ավյունով գեղեցկացել,  
 Հայոց արքա Արշակունի Մեծ Տրդատին նկարագրեց  
 Տեսիլն ահեղ և փառավոր, նախորդ գիշեր իրեն շնորհված:  
 Ծունկի իջան հայոց արքան, արքայազունք պալատական,  
 Եվ ուխտեցին փութանակի, ժողովորդով միասնական,  
 Կերտել տաճար մի սրբազան, ի հիշատակ Աստվածածնին  
 Սրբուհի մորն Աստվածպարզև Տյառն Հիսուսի՝ «Էջմիածին»:

Այն օրվանից մինչև այսօր, հազար և յոթ հարյուր տարի,  
 Ժամանակը սլանում է առանց կանգառ ու դադարի.  
 Կառուցվում է տաճարն այս հին ժամանակի ավերներից,  
 Վերակերտվում տաճարն այս հին մեր թշնամյաց ավերներից:  
 Կառուցվում է հավերժական տաճարն հայոց ամբողջ ազգի,  
 Զեռամբ մեն մի գահակալի Լուսավորչյան Սուրբ Աթոռի:

Եվ տե՛ս, որդի հայկյան վարմի, դու՛ ժառանգորդ թանկ ավանդի,  
 Սուրբ Գրիգորն ու մեր նախնիք կառուցեցին տաճարն այս սեգ,  
 Նա չեղավ լոկ ամրախարխիսի ու նյութեղեն մի կերտըվածք,  
 Նա եղավ պու՛ն, ոգու տաճար, մի նոր կլանքի կանչող տապան:  
 Դու ծնվեցիր նրա ծոցում, դարձար որդին վերածնված  
 Նոր Սիովնի, դարձար վկան քո հավատի, պայծառացար,  
 Ժանտ թշնամու սրի դիմաց կուրծքդ դրիր, չվախեցար:  
 Քանի անգամ փառքով մեռար ու թաղվեցիր, բայց միշտ հարյար,  
 Դարե ի դար ուխտի եկար, քո հայրենյաց փառքով սևար,  
 Եվ ուխտեցիր փառքն հայրենյաց պահել բարձր, սուրբ ու անբիծ,  
 Եվ փոխանցել այն անաղարտ սերունդներին մեր հայրենյաց:

ՆԵՐՍԵՍ ՎԱՆԱԿԱՆ

4 փետրվար 1986 թ.

